

ΣΥΝΘΕΣΙΣ

DISPUTATIO INAUGURALIS  
MEDICA

DE PESTE

QUAM

CONSENSU ET AVTORITATE AM-  
PLISSIMÆ IN ILLUSTRIS ACADEMIA

IVLIA FACULTATIS MEDICAE

P R Æ S I D E

VIRO AMPLISSIMO CLARISSIMO QVE

HERMANNO CONRINGIO

Philosoph. & Med. D. & ibidem Professore

public, longe celeberrimo, ac collegii Medici

hodie Decano spectabili &c

Præceptore & promotore suo ætatem

venerando

PRO LICENTIA

Summos honores & Privilegia Doctoralia in

Arte Medicâ rite consequendi, publice horis ante

& pomeridianis proponit

THEOPHILUS MATTHÆUS

HILDESIENSIS

IN MAGNO JULEO


Ad diem 29 Novembr. Anno c15 15 c LIX.

HELMESTADI,

Typis HENRICI DAVIDIS MULLERI, Acad. Typ.


M DC LXXIIX.

*Duplicate*





## THESIS I.

 Enus humanum, post lapsum primorum parentum, originalis peccati contagione pollutum, insitâ pravitate, à divinorum mandatorum tramite declinans, seque in omnia vitiorum genera ultrò præcipitans, justo licet Dei judicio infinito propemodû gravissimorum sæpius morborum corripitur agmine; ex omnibus tamen sævitiâ ac malignitate immani truculenta facilè tenet primas Pestilentia. In cujus naturam disquisitionem in præsentiarum instituere, animus est. Quam statim imploratâ prius ope divinâ aggredimur.

### I.

Cæterum ne ambiguitas vocis, veritati indagandæ sit impedimento, cum cujusvis disputationis principium, etiam juxta Galeni monitum, ab ipso rei nomine sit desumendum, serio id quoque nobis jam incumbit.

### III.

*Dicitur* ergò Pests, sive à πέρσειν quod cadere, aut prosternei denotat; Sive à pessum, quod quos semel corripuit, facilè pessumdet; Sive à pascendo, quod instar belluæ venenatæ urbes integras depascit, & regna funditus evertat; Sive à perimendo, quod in morem jaculi de repente adoriatur mortales. Sive aliundè verò sit dicta, parum aut nihil morabimur, dummodo effectus nemini ac nulli sit incognitus.



Pro evitanda autem vocis æquivocatione, sciendum est  
 1. & in genere significare Pestem rem quamcunque perniciosam quæ damnum aut exitium inferre apta nata sit. 2. Sapius Galeno ita audire statum seu constitutionem anni pestilentem, hujus morbi feracem 3. in specie morbum perniciosissimum, ac periculosissimum, quo qui laborant, plurimi intereunt, aliosque plerumque inficiunt. Græci hoc malu *μολιμὸν ἢ νόσον λοιμικλή*: Galenus *ἐπιδημίαν ἐλέθειον*; Latini *Labem*, alij *Contagium* dicunt. Germani servatâ Latinorum denominatione die Pest oder die Pestilenz, das sterz bend indigitant.

## V.

Quò magis vero, & in quantum licet, exacta hujus morbi possit reddi definitio, aut potius descriptio, meritò prius de ejus genere constare nobis debet. *Massarias* etenim cum aliis, ad nullum directè morborum classem malū hoc pertinere, sed omnium omninò formam induere posse putavit; nec enim esse nomen certi cujusdam morbi, sed commune omnibus iis, quibus hæc duo accidunt; ut sint à vulgari, sive Epidemiâ, causâ & plerosque interficiant; idq; eò maxime confirmari, quia tam multa ac diversa secum juncta habeat Pestis morborum & symptomatum genera. Verùm enim verò, etsi non diffitemur, vario quasi malorum colore fucatam, & multiplici symptomatum catervâ sæpius stipatam Pestem prodire in hanc mundi scenam; accuratè tamen attendendum hic est, ne accidentia, quæ pro variâ corporis humorumque constitutione alia alios exercent, pro morbo accipiantur primario. Insequuntur enim Pestem quidem Symptomata varia, sed quoniam suapte naturâ tam truculenta non sunt, ut omnes exitio prosternant, hinc ad Pestis essentiam propriè non pertinent  
 sed



sed per accidens eveniunt. Qualia cum primis multa observavit, & posteritatis memoriae tradidit *Rolandus Capellanus libello de Peste Parmensi*, quem Amplissimus Dominus Praefes publicari curavit.

## VI.

Alii cum viderent Pestem esse contagiosam, vel saltem plurimos uno eodemque tempore regionis aut urbis alicujus incolas invadere, morbis Epidemiis rectius adnumerari illam persuasum habent. Et tamen melius fortasse sentire videatur *Eustachius Rudius Lib. 1. Practic. cap. 30.* dicens: morbum esse Epidemium, ad pestis essentiam haud pertinere, sed accidens quoddam esse, ab ejus naturâ prorsus extrinsecum, quod nimirum causam pestilentiae communem, vel ejus effectum contagium insequatur. Quapropter etiam *Sennertus lib. 4. de Febris cap. 1.* concludit: Si vel unus in urbe peste corripere, eundem peste laborare non negandum propterea, quod solus ille laboret. At verò distinguendum arbitramur inter Pestem, & morbum pestilentem aut pestiferum. Pestis enim vox, apud omnes scriptores Græcos pariter ac Latinos morbum communem semper significat; Pestilens verò etiam ille est, qui nondum actu est communis, modò eâ sit naturâ, ut facile communis reddi possit. Perinde scilicet atque in republicâ cives interdum seditiosi reperiuntur, seditionem tamen aut non, aut nondum moventes. Quo simili rem hanc egregie illustrat eximius Philosophus pariter & Medicus *Philippus Scherbius in Thesisibus de pestilentia num. 7.* Porro & hoc observandum, omnem quidem pestem esse Epidemiam; Utrum verò omnis etiam sit contagiosa, nondum perinde compertum esse. Certè negarunt hoc ipsum tres illi *Hieronymi in Scholâ Patavinâ clarissimi, Mercurialis, Capiuaccius,*



*Aquapendens, inque Germaniâ nostrâ celeberrimus trium  
Imperatorum Archiater Johannes Crato.*

VII.

Nonnulli porrò Pestem alicubi morbum esse Endemi-  
um opinantur, eâque perpetuo Syriam & Ægyptum, sæpius  
Cayrum & Constantinopolim affligi autumant. Verû, cum  
neque istis locis Pestis sit perpetua, nec statas planè perio-  
dos observet, sed perquam inordinate, pro causarum va-  
rietate & inconstantia, loca isthæc invadat; neque hoc pro-  
babile nobis esse videtur. Namque in populosis urbibus,  
ubi maximus hominum est confluentus, observare quidem  
licet, ferè nunquam non grassari aliquid quasi pestilens; at-  
tamen verè pestilens malum illud non esse videtur, alioquin  
non adeò clementer sese gereret. Multò minus est Pestis  
ipsa; ut quæ vere & reapse commune aliquod malum sit.

IX.

Cæterum scholæ Medicorum, juxta triplicem partium  
constitutionem, tria prima atque summa morborum gene-  
ra constituentes, partem similem ab intemperie lædi,  
dissimilem deformari à malâ compositione, utramque di-  
velli unitatis solutione docent. Hinc verò evidenter sanè  
manifestum est, in duorum posteriorum classem minimè  
posse Pestem referri. Quamvis sanè bubones, carbunculi,  
aut pustulæ Pestem sæpius comitentur; hi tamen secunda-  
rij duntaxat morbi sunt, eoque cum primario minimè  
confundendi, præsertim cum à Peste interdum absint.

IX.

Atque hinc quidem videtur jam statim patère, omnem  
Pestem orbem esse intemperiei. Quin imò, ut hoc ipsum  
eò magis persvadeant, contendunt multi clarissimique Me-  
dicorum, ut *Fracastorius, Massarius, Portus, Horatius, Augenius;*  
*Johannes Heurnius, Thomas Jordanus,* alijque complures in  
omni.



omni peste semper adesse febrem. Oppositum tamen tenent *Columba, Cornelius Gemma, Sennertus* & alij, eo prætextu, quod primum nulla intemperies subito existat, sed aliquam saltem postulet moram, dum partibus se insinuare possit, Pestis autem subito celeriusque quam ut talis fiat impressio, ingruat; Quod secundo nulla intemperies tantis tamque subitis stragibus urbes agrosque cumulet, uti fit à Peste. Et vero fidem facit historia, etiam antetriennum Neapoli quotidie tria millia, ac spacio quinque mensium, ut jam olim Constantinopoli imperante Leone Mauricio, 300000 hominum peste periisse.

X.

Itaque in nullâ morborum triplicis illius ordinis classe locum invenire Pestem, autumant illi recentiores, sed aliam Pesti familiam quasi adscribunt, eorum scilicet morborum, qui phrasi Galenicâ καὶ ὅλην τὴν ἑστίαν appellentur, quosque ipsi in occultis qualitatibus, quæ ab intemperie planè sint distinctæ, constare arbitrantur. Cæterum *Galenus* quidem, per totam substantiam, non occultas intellexit qualitates, quæ à formâ etiam occultâ procedant; sed totum adeò rei essentiam, quatenus opponitur qualitatibus, ut totum opponitur parti. Hinc dicit ille, alia agere per qualitatem, id est, per hanc, aut illam qualitatem, alia vero totâ essentiâ, id est, per omnes qualitates simul sumptas, quæque adeò ita simul sumptæ constituunt totam cujuslibet rei essentiam. Ideoque cum omnium partium corporis viventis essentia, non nisi debito temperamento, decenti conformatione, & legitimâ partium unionē ex Galeni sententiâ absolvatur; saltem hoc manifestum est, Galenicæ doctrinæ nequaquam esse consentaneum, quod morbi totius substantiæ in occultis qualitatibus partium hæreant, aut quod constituent morborum novum aliquod genus, præ-



ter tres illas classes. Ad hoc nullo potest firmo argumento ostendi, quicquid etiam hi recentiores dixerint, ad essentiam partium corporis nostri, sive similarium, sive dissimilarium, occultas aliquas qualitates pertinere: eoque non potest probari, dari aliquod in illis qualitatibus occultis singulare morborum genus. Per se porro claret, si quæ etiam sint in partibus occultæ qualitates, eas non absolute totam partium essentiam, atque adeo ineptè à recentioribus vocari illarum qualitatum affectus, morbos totius substantiæ. Illi scilicet demum morbi merentur hoc nomen, qui essentiam partis viventis omnimodo corrumpunt, quale quid sit quando caro aut sanguis in pus resolvuntur. Fatemur scilicet alias etiam nos, dari morbos formæ, quos nonnulli appellant: imò profitemur omnes morbose esse morbos formæ, utpote cum omnes essentiam partium similarium aut dissimilarium lædant, sive intemperie, sive malâ conformatione, sive unitatis solutione. Quod tamen latius agitare non est hujus loci.

## XI.

Pestem porro proprie loquendo esse morbum totius substantiæ, ostendi non potest. Non sane experientia probatum est hætenus, in Peste vel integri corporis, vel unius partis totam essentiam, sive totam substantiam, quod perinde est, ita corruptam esse, ut hinc strages illa pestilens exorta sit. Calidum tamen vitale vehementer affici in omni peste, certo constat, utpote cum in hujus extinctione mors, quæ pestilentes morbos adeo frequenter excipit, collocata sit. Affici verò illud ita potest, etiam à solâ intemperie, quæ tamen vehementer calido nostro vitali adversatur, atque adeo non est vulgaris. Hinc non etiam dubitamus referre Pestem ad morbos



bos intemperiei, non quarumvis quidem partium, sed cordis potissimum, & quidem in quantum cor est sedes nativi calidi. Neque verò ullius sunt momenti, ea quæ thesi ix. in contrarium adduximus: ac proinde nec in illorum confutatione nunc occupabimur. Nec tamen etiam propterea dixerimus, quod alii faciunt omnem pestem esse febrem, aut febrem esse primum quorumvis pestilentium morborum affectum. Credimus enim & nos; febrem interdum à Peste abesse, quamvis illam plerumque comitetur, & quidem interdum hectica, pestilens maxime sit communis & perquam vehemens Pestis species.

## XII.

In universum igitur, Pestis omnis est morbus Epidemius summe perniciosus, vel magna ex parte lethalis: aut, ut cum Galeno duobus verbis loquamur, Epidemia perniciofa. Essentiâ porro pestilentis illius affectionis consistit in vehemente quadam & subita intemperie, apta calorem nativum facile extinguere.

## XIII.

Investigatâ Generis & quasi Formæ pestilentium affectuum notione, ad inquirendum subjectum ipse nos ordinis invitat ductus. Ubi jam statim sine ultiore laboriosa inquisitione se nobis sistit Cor, viscus primum humani corporis, arx vitæ, calidi innati sanguinisque fons & scaturigo. Quantocyus etenim virulentus hic hostis incursionem fecerit, illicò sanè præceps insequitur vitalis roboris dejectio atque oppressio, & hoc ipso pestilens quisque affectus hominibus maxime est noxius, illa autem vitalis calidi repentinâ labes, non potest alibi, quam in corde, quod quasi fons est caloris vitalis, primo & per se contingere: ceu jam ante disputavimus. Quamvis verò in omni omnino peste cor primario laborare censeamus, non negamus tamen alias quoque



quoque partes affici: tantum id volumus, in illarum partium affectionibus ipsam pestilentium morborum (in quantum sane sunt pestilentes, sive usque adeò perniciosi) naturam & vim haud esse collocatam. Quocunque scilicet loco stabuletur materia pestilens, singulari antipathia cor caedendumque nativum primario semper afficit & infestat, ut homo saepe subito ac multò citius quam pro mali istius, quo cum conjungitur natura, pereat.

#### XIV.

Observari autem hic omnino meretur, quod quædam Pestes in communi soleant certas corporis partes, præter cor vehementer afficere. Sic ab Ægineta prodita memoria est colica Pestis l. 3. c. 43. Peripneumonica Pestis Fracastorio memoratur. Pestis pleuritica descripta est à Joanne Wiero. Ab aliis Phrenitides, Dysenteria, & hepatitides pestilentes narrantur. Anginosa quoque Pestis à non uno observata est. Similis fuisse videtur Neapolitana illa *male incanna* vulgo tum dicta; quâ anno 1617. brevi temporis spatio ad sexaginta millia infantum, hanc enim aratulam cum primis adoriebatur, præter innumeros cujusvis conditionis homines, intra septimum ab invasione diem, nihil proficientibus antidotis, extincti sunt, ut refert Athanas. Kircherus l. de peste Sect. 1 c. 9. Mercurialis meminit cujusdam Pestis, quæ pedes, tibias, atque os ita infestabat, ut intra triduum correptos plerisque perimeret. Notata & Georgio Agricola Pestis, est quæ homines veluti stupefactos sideratosque omnibus membris conficiebat: item alia, quæ totum ferè corpus in putredinem verminosam resolvebat. Nemini porro ignota est Pestis illa, quæ sudoris Anglici nomine usque adeò toti Europæ avorum memoria fuit infesta: quæ reapse fuit colliquatio humorum omnium corporis in serum. Omnium maxime vulgaris est Pestis, quam nunc bubones, nunc carbunculi,



bunculi, nunc petechiæ pestilentes consequuntur. Observandum porro & hoc est, interdum in Peste varias corporis partes affici sed non æque communiter, sed in aliis alias. Quale quid cum primis factum esse in memorabili illa peste Atticâ ex Thucididis historiâ, in Parmensi ex Rolando Capelluto omnino dignum est petere.

## XV.

Ad subjectum Pestis hoc etiam pertinet, quod quidem plerumque sine discrimine in Peste homines afficiantur, & laborent: interdum tamen Pestis non nisi certos homines corripit, discrimine observato, ætatis, sexus, natalium, aliarumque rerum. Perinde scilicet, atque in aliorum animantium genere, pestes aliæ boves, aliæ oves, aliæ porcos, aliæ pisces duntaxat aut alia animantia tollunt è medio. Talis fuit illa Pestis quâ unâ nocte omnes primogeniti Ægyptiorum, salvis Israelitis, reliquisque omnibus, perierunt. Talis fere illa Neapolitana, cujus modo meminimus, quæ præcipuè sæviit in infantes. Narrant, inquit Kircherus l.c. Valentia in Hispaniæ anno 1648. pestem derepente exortam: primò quidem præter sutores nullum alium invasisse, tandem omnes illos qui crepidis calceisque ab iis coemptis uterentur, adortam fuisse, atque hoc pacto serpente contagione mox universum regnum invasisse, Eiusdem Kircheri verba hæc sunt sect. 2. c. 3. Pestis subinde juvenes, nonnunquam mulieres, interdum virgines aut gravidas tantum invadit, virili vero sexui parcit. Observatum fuit à Mercuriali, Pestem invaluisse tempore Juliani Apostatæ, quæ tertiam tantum ordine domum invaderet, intermediâ ab omni contagione libera: cujus tamen incolæ, dum desertâ statione pestem vicinam tugiunt puriorem aerem quæsituri, tunc tandem peste occupati, ubi minimè putabant interire. In America indiginæ certis morbis contra-



gione plenius infestantur immunibus ab iis Europæis. Refert Ingrassia Basileæ Pestem invaluisse quæ solos Helvetios infestavit, minime Gallos aut Italos. Quosdam tempore Gregorij magni sanos adhuc & viribus robustos, veluti fulmine quoddam sagittatos, alios solâ sternutatione aut oscitatione concidisse memorant. Memorant & Historici Franciæ, Pestem quandoque in solos nobiles & divites sævisse, non in pauperes & mediocri fortune homines. Tempore Cæsaris Maximini Pestis in solos paganos sive ethnicos, minime Christianos suas explicuit vires. Hæc omnia Kircherus. Quorum similia cum à compluribus aliis memorentur, non est quare in dubium vocari debeant.

## XV I.

Cæterum de subiecto pestis forte plus est satis dictum: ad causas nunc progrediendum est, cum autem causarum aliæ sint remotæ, alia proxima, quæ illarum est effectus; quænam sit proxima efficiens Pestis causa, ante omnia querendum erit. Jam verò in omni Peste eximiam aliquam putredinem facile est observare: eoque non equidem dubitamus pernicipi illius omnis pestilentis causam proximam collocare in malignâ, sanguinis cum primis, tandem vero & aliarum solidarum corporis partium putredine, quæ tantâ, nimirum est, ut plerumque sit læthifera, semper verò perquam infesta calido vitali cordis. Vidit hoc ipsum etiam Galenus noster: eoque febrem pestilentem, inter putridas collocavit: cujus solâ autoritate moti, perquam multi Medicorum, in eandem sententiam concesserunt. Huc pertinet etiam illa Andreæ Cæsalpini *disputatio l. I. Quæst. Medic. XII.* quâ probat: Febrem pestilentem solâ putredinis malignitate, non loco, differre à cæteris. Præbet verò putredinis illius indicium, is qui statim initio ex peste affectis corporibus exhalat foetor, præprimis foetor anhelitus,



litus, & dolor capitis ex putridis evaporationibus exortus. Eadem proditur cadaverum peste confectorum subita contabescencia & intolerabili plerumque foetore, ac vermifera putrilagine. Et verò in dissectione etiam bubones innumerabili vermium minutissimorum foetura refertos, observavit nuper Julius Placentius Medicus Romanus teste Athanasio Kircherosect. 2. cap. 4 de Peste. Nec dubito ad illum modum semper illos sese habere & habuisse, etsi olim observari id non potuit, ob microscopiorum defectum: cum jam olim Galenus lib. 3. Epid. in 3. Epid. 24. docuerit: tuberculos pestilentes aut non suppurari, aut in putredinem diversam à pure abire. Facit huc, quod idem refert sect. 1. §. 4. Observatum fuit, inquiens, à vespillonibus fide dignis, iis in locis, ubi pestifera lue extincti sepeliri solent, omnes circumfitas plantas dictis vermibus infectisque ita scatere, ut qui non propriis oculis compererit, ut id credat, induci vix possit. Ajunt autem esse æruginem quandam, non similem illi, quam singulis annis herbæ statutis temporibus generant sed degeneris omnino & spuria, sive formam sive colorem spectes naturæ. Jam tum olim verò proditum Aristoteli, aliisque, insecta pleraque, non vermes, ex putridis humoribus generari: aut quæ sunt putrida, eorum pleraque facillime reddi vermifera. Unde & Lucretius dixit:

—— obnoxia cuncta putrori,

*Corpora putrores insecta animata sequuntur.*

Neque tamen quis temere credat, id quod nuper de mum Kircherus conatus est persuadere: *omne putridum ex se & sua naturâ vermes generare*: etsi illa laus meritò huic viro ingenioso atque summe industrio debeat quod microscopii ope multis præclaris novis experimentis veterem doctrinam illustraverit sect. 1. cap. 7. §. 1. & 2. libri de peste.



Perinde ac Sennerto ejusque sectatoribus nemo temere crediderit, ex putredine vivum nihil generari posse. Quomodo enim cum putredine interdum conjuncta sit generatio, interdum non, docuit Amplissimus Dominus Præses *L. de Fermentatione c. 3. & 4.* Nec tamen verminosam illam putredinem propterea ab eodem Kircherò acuerate esse dictam credimus *sect. 2. cap. 4. Pestem plerumque esse animatam.* Perinde nimirum illud ἀνύψως dictum, atque ab alio quopiam ridicule *viva mortis imago* in scenam est producta. Tales nimirum loquendi rationes, in poëta quidem laudaveris, in philosopho tamen nemo sapiens toleraverit: ne quid nunc dicam de ineptiis queis vivas illas mortes auctor voluit orbi persuadere. Ostenditur verò denique putredo in pestilentibus morbis latens, etiam ex eo, quod ceu (mox pluribus docebimus) plerumque Pestis à manifeste etiam putridis rebus soleat produci. Quod enim putridum est, id alia quoque putrescere apta in putredinem resolvit. Ut non possint non humores nostri corporis à rebus putridis infecti (quod fit in peste) etiam ipsi computrescere.

## XVII.

Posse verò à putredine oriri omnia Pestis symptomata non est cur quis dubitet. Nullum certe quisquam symptoma pestilens nominaverit, quod non ad illam tanquam causam facili negotio referri possit. Nec verò est, quod cui videatur minus verisimile, citò adeo putredinis vim posse in corpore nostro invalescere, perinde atque videmus Pestem derepente homines prosternere. Etsi enim à solis causis internis tanta tamq; subitanea violentia proficisci nequeat; nihil vetat tamen tale quid fieri à causis externis, quæ vi quâdam venenatâ præditæ sunt. Certe venena quamplurima subitò putrefacere posse, non humores duntaxat, sed etiam



etiam solidas corporis nostri partes, multiplici experientia plus quam satis est compertum. Ab ejusmodi autem causis externis produci pestem mox fiet manifestum,

### XIIX.

Inquirendum videlicet nunc porrò est in causas malignæ illius pestilentis putredinis, atque adeò in causas Pestis nonnihil remotiores. Ubi primò in quæstionem venit, num pestifera putredo possit in corporibus humanis oriri, si non accedat aliunde aliud aliquid putredinem ejusmodi producere idoneum, Dicimus si non accedat. Posse enim ab exortâ aliunde putredine confieri multa putrida, quibus vis deinde sit in aliis corporibus cæteroquin sanis putredinem pestilentem ciendi, fere vacat dubitatione. Cæterum nihil si præcesserit putrefaciens, haud credimus sponte sua in corporibus humanis putredinem pestilentem posse produci. Nec verò ita credimus, imbuti illis argumentis quibus nonnulli propugnant, quod venenosi nihil in corporibus hominum sponte queat nasci: fatemur enim illa nullius esse ponderis: quanquam nec illa sint satis valida, quibus alii contrarium adstruunt. Argumentum autem nostrum est: quod hætenus nullo experimento fide digno sit ostensum, tale quid pestiferum sponte ita natum esse. Quod autem hætenus factum non est naturæ viribus, illud nec fieri potest naturâ; cum nihil naturâ fiat quod non ante sit factum.

### XIX.

Quicquid igitur in corporibus nostris pestilentem putredinem producit, illud non potest non foris advenire. At ejusmodi causæ morbum, aliæ interdum vires naturæ solent excedere, aliæ & quidem pleræque naturalibus agunt facultatibus. Ac de Peste quidem nonnulli credunt, eam semper a causis supernaturalibus proficisci, nonnulli



nunquam. Quos inter mediânos viâ incedentes, interdum  
supernaturalem plerumque naturalem ejus originem esse  
asserimus. Illam dicimus, quando immediate à Deo, aut  
infestis Spiritibus Pestis exoritur. A Deo autem, vel solum  
Dei jussu ab angelis pestem aliquando immediate concita-  
ri, docent nos multæ Pestium sacræ historiæ. Talis enim  
utique fuit illa quâ primogeniti Ægyptij perierunt: talis  
qua Davidis tempore septuaginta hominum millia tridui  
spatio extincta sunt: talis etiam illa, quâ centum octuagin-  
ta quinq; millia exercitus Sennacheribi Assyriorum Regis  
unâ nocte è medio sunt sublata. Supernaturalem originem  
omninò quoque habuerunt illæ Pestes, quas mali dæmo-  
nes interdum excitaverunt: quarum exempla solent ex  
Nicephoro, Philostrato, Jamblichio, Gregorio Nysseno ali-  
isque recitari. Etiam vero huc pertinent plæræque illarum  
Pestium, quas Sagæ sive pharmaceutriæ magicis præsidiiis  
solent commovere. Quanquam etiam ad illarum produ-  
ctionē adhibeantur res nonnullæ, illæ tamen potius valent  
ut symbola quædam sive sacramenta visibilia invisibilis ma-  
leficii magni, quam naturali virtute: quæ fere est communis  
natura Magicorum. Magicis autem mediis interdum pro-  
duci pestem solere, docent cum veteres tum recentissimæ  
historiæ fide dignissimæ. Talem enim Pestem jam tum olim  
descripsit Livius *lib 8. Decad. 1.* quæ Romæ sævierit:  
tales complures alias quibus plurimi laboraverint, narrat  
Cedrenus Zonaras Nicephorus alique. Talem longe re-  
centissimam commemorat & Hercules Saxonia. *Nemini  
inaudita est, scribit Athanasius Kircherus l. de peste sect 1.  
cap. X. horrenda illa pestis, quæ anno 1630, Mediolanum ad  
ultimam prope ruinam vexavit; ejus origo uti acta docent,  
ab execrandis sceleratorum hominum maleficiis, qui sive  
ab hostico furore magnâ pecunia vi propositâ allekti, sive*  
*con.*



conceptio in morum censores valde, & bene quodammodo  
prorsus violentiâ referunt, utique Cacadamone auctore & dire-  
ctore confecerunt; quod templorum postibus, domuumque postis,  
scamnis, fenestris illitum, vel ad minimam contrectationem homi-  
nes ad inevitabile mortis periculum deduceret. Et quoniam homi-  
num morientium nullus finis, nec ulla tanta mortis antidota su-  
peresse videbantur, ad superna auxilia per publicam precum indi-  
ctionem, processionum piè divina misericordia supplicantium ap-  
paratum jejuniorumque observationem confugere, ut divina rigor  
justitiæ flexus tantis castigationibus tandem finem imponeret; unde  
nova processio instituta &c. Addit paulò post processionem  
sacram institutam quidem esse, de veneficis vero subdit:  
turba itaque hominum numerosissima sese insinuantes, vestibulis  
supplicantium præparatum inferebant venenum; unde mox ingens ex-  
ortia strages publicam solemnitatem suspendit. Paulo post scri-  
bit: unguentum illud, illumq; pulverem pestiferum, earum fuisse  
virium, ut non haustu duntaxat malum fuerit propagatum, sed  
vel odore susceptum intra paucas horas interemerit. Quin sub-  
jungit Kircherus, similem pestem veneficorum operâ intro-  
ductam anno 15. Mediolanum & Genuam expertam esse. Historicis  
item Francia testari, pestem illam longe vehementissimam quæ an-  
no 1320. Franciam pene exhaustit, ab intoxicatis aquis fontium, pu-  
teorum, cisternarumque profluxisse. J. Bodini verba sunt l. 4.  
de Magor. dæmonoman c. 4: Apud Pedemontanos fœmina  
quædam nomine Androgyna videbatur, cum intraret in alienas a-  
des & paulo post homines interibant: comprehensa itaque sagarum  
cinnam, consorzium ejusdem moleficij, retexit conjurationem  
(erant autem quadraginta ferme quæ exteram januarum manum  
ad necandos homines perungebant. Id tum MDXXXVI acci-  
dit. Geneva quoque postea idem effectum est anno MDLXVIII,  
ubi ad septennium fuit pestilentia, ex qua occubuerunt multi.  
Idem l. 4. c. 5. sub finem scribit Memini me in Malleo malefica-



um legere, Pestem de vicis Germania in agro Constantienſi non abi-  
viſſe, donec ſagam quandam humo eruiſſent, & in cinerem redigiſ-  
ſent corpus. Hæc Bodinius. Quam crudeliter ante hoc bien-  
nium præter propterævierit Peſtis ex venefico orta in  
nonnulla Sileſiæ loca, prodiderunt nobis novellæ hebdo-  
madariæ, uæ appellantur. Nec cuiquam temere eſt ignotum  
quid nuper admodum veneficus veſpillo conatus fuerit  
Magdeburgi in viciniâ. Ex quibus quamvis paucis mani-  
feſtum utiq; eſt id, quod aſſerimus, Peſtem interdum à vir-  
tute quâdam ſupernaturali ſolere exoriri.

## XX.

Magis dubium eſt, num ab aſtris ſive fluat interdum, ſive  
in hoc aëre producatuſ vis ejuſmodi peſtitera. Quamvis  
autem à quam multis non ex vulgo tantum hominum,  
ſed etiam ex eruditorum ordine ſtrenue aſſirmetur, ſi non  
utrumq; ſaltem alterutrum: non dubitamus tamen aſſere-  
re, neutrum horum, multò minus utrumque vel experien-  
tiæ vel ratiocinatione firma poſſe probari, atq; adeo omne  
hoc merè eſſe commentitium. Sane multis conatus eſt &  
Athanaſius Kircherus ſect. 1. cap. 11. l. de Peſte id probabile red-  
dere: non potuit tamen ullum fide dignum experimentũ,  
multo minus firmam aliquam ratiocinationem adferre in  
medium. Quod tamen ſaltem in mathematico doctore, quo  
nomine cum primis Kircherus potiffimam laudem hæte-  
mus ſibi comparavit, neutiquā poteſt tolerari. Adeo abſur-  
da porro ſunt Kircherianæ doctrinæ poſtulata, ut nullo mo-  
do queant admitti. Quale eſt: aſtra eſſe compoſita ex quatuor ele-  
mentis: Martem & Saturnum exitiali virtute inſignes eſſe, illum  
quidem virulentia nescio quâ hunc vero frigidityate oppido nociva:  
ut & quod docet ſect. 1. cap. 11. ſ. 3. maculas Solis eſſe eructationes  
morboſas, & aperiri intra viſcera Solis latentis peregrina fuliginis  
indicta: item, cometas ut plurimum ex evaporatione ſolaris corpa-



ris, dum vehementius astuans ingentes in aethere fumos ejaculatur, generari. Ejusmodi autem multa & alia ille adfert, nullis tamen experimentis multò minus demonstrationibus ullis instructus, quamvis mathematicus: à quo nihil erat expectandum nisi alterutra ratione firmiter probatum.

## XXI.

A Coelo igitur pestiferum nihil quidem provenit. Quoniam tamen certum est, forinsecus affici corpus nostrum; primo omnium videbimus, quale illud sit, quod pestilentem affectum producit. Atque nonnulli quidem dicunt, *Spiritus illud esse sylvestrem fermento mumiali tinctum*. At reapse hoc ludere potius est, & ænigmata fingere, quam aliquid vere docere. Portenta enim quidem verborum audias, sed vix quidquam aliud. Quid enim illud est, *Spiritus Sylvestris*? quid est, *tinctum esse mumiali fermento*? Utq; tandem hæc possint intelligi, arguunt tamen asserentium talia vanitatem: quò nullo argumēto addito talia proferantur. Merito igitur hæc quidem contemnimus, ceu examine serio indigna.

## XXII.

Alii inter quos est & Sennertus, statuunt pestiferum illud externum venenum aliquod esse. Verum etiam illis merito reponimus illud Philippi Scherbii ex th. 28. disputationis de Pestilentia: *Qui si farentur improprie se loqui, & veneni nomen populariter & latiori quadam significatione usurpare, ferendi sunt. At per se & proprie sumptum, (ut Medici in suis scholis accurate inter perniciosum, malignum, pestilens & venenum sive venenum distinguunt) sine ulla dubitatione negamus & pernegamus in peste esse venenum. Quod si interdum (quod in Gallis aliquando à Indeis factum scribunt) putet veris venenis inficiuntur, ita ut neque putredo, neque contagio ulla in aquis appareat: proprie hoc malum non erit Pestilentia. Aliquid tamen*  
C 2 veneno



veneno simile in Peste omnino agnoscimus. Perinde enim  
scilicet atque venena homines plerumque cito è medio tol-  
lunt, ita & in homines sævit virus pestiferum. Cæterum  
& venena admodum sunt varia, nec uno modo possunt re-  
pelli. Hinc nec si venenosum quid dixeris in Peste esse, jam  
atis explicasti Pestilentis causæ naturam. Chymicorum  
nonnulli id deprehendentes lucem aliquam addere conati  
sunt. Eoque venenum illud nunc arsenicale, nunc mercu-  
riale nunc viperinum nunc napellinum esse docuerunt,  
quasi nimirum illis venenis sit analogum. Nec vero saltem  
ille conatus rem illustrandi, est improbandus. Attamen  
quoad effectum raro est inter illa venena & virus pestiferum  
convenientia: & illorum quoque venenorum natura est  
fere incognita. Proinde etiam isthæc doctrina parum  
aut nihil juvat. Suffecerit fortassis dicere, pestiferum il-  
lud eâ esse naturâ, ut à calore nostro concoqui nequeat,  
ipsum autem summâ pollere vi & penetrandi in sanguinem  
atque ad cor usque, & putrefaciendi sive corrumpendi.  
Nec tamen cum Andrea Cæsalpino l. 1. *Quest. medic.* 12. quem  
sectatur Scherbius, dixerimus, causam ejus, quare supe-  
rari à calore nostro aut concoqui nequeat, esse crassitiem  
partium. Etsi enim quæ crassiora seu *παχυμερῆ* non fac-  
ile superentur, non tamen hoc solis convenit: sunt enim  
etiam quædam *λεπτομερῆ*, quæ scilicet in subtilissimos spiri-  
tus possunt resolvi, incoctilia tamen sunt: ut ex adverso sic  
satis multa crassarum sunt partium (qualia utique sunt  
omnia alimenta) & tamen possunt à nobis concoqui. Non  
sane firmo satis argumento sententiam suam Cæsalpinus  
stabilivit: utique non iis, ut Scherbius merito dixerit th,  
25. Cæsalpinum γεωμετρικῶς docuisse. Porro neque id au-  
demus profiteri, quod primus nempe affirmavit ingenio-  
sissimus Kircherus, virus pestiferum plærumque animarum  
esse,



esse, sive constare ex plurimis exiguis vermiculis. Neque vero hoc quidem Smicroscopiorum adminiculo, vel ille vel quisquam alius expertus est. Neque est ulla in promptu ratio quæ id demonstret. Et verò qui possint omnia pestifera seminaria in aere volitantia smicroscopiis explorari? Qui possint eadem smicroscopiis videri, etiam simulac jam corpus aliquod infecerunt? Nec vero est ulla vis consequentiæ in illâ Kircheriana collectione: vermes in Peste frequenter generantur; ergo & ipsa Pests seminariâ vermiculi sunt. Sane non minus ferè ridicula est collectio illa, atque nonneminis alterius; qui non nisi paucis illis Kircheri aliquot experimentis subnixus, audet intrepidè pronunciare: in omnibus ex putredine ortis morbis verminolam progeniem reperiri, nec aliunde esse cephalalgias contumaces, dolores pleuriticos, rosiones stomachi & intestinorum, convulsiones epilepticas, & podagricas (ut ille loquitur) torturas.

### XXIII.

Antequam inquisitionem in naturam pestiferi venoni deferamus, non possumus non advertere in sententiam Joannis Helmontij, quam proposuit eo libello, cui titulus *Tumulus Pests*. Est autem illa adeo novis & portentosis verbis proposita, ut commodum sensum vix liceat assequi. Videtur autem hic esse. Malignum aliquod externum virus exipitur primum ab eo, quod appellat *gas fracidum*, sive sero sanguineo haud coagulabili; hinc Archeus (ita autem vocat opificem & directorem spirituum vitalium) perterritus, idæam sive imaginem Pests concipit, ut officio suo haud amplius satisfacere queat: ita pestifero veneno aperitur via, ut possit totum corpus corrumpere & perturbare. Aliter Helmontij mentem exponit Kircherus sect. 2. c. 1 & quidem quasi venenum pestilens in iplo Ar-



Archeo sit collocatum: eoque sensu Helmontium oppugnat. Et vero difficile est mentem hominis assequi, quoniam sermone utitur non perspicuo, qualis debet esse eorum qui docent, sed ænigmatico, qui solet esse nugatorum. Quæcunque vero fuerit hominis mens, plena est ineptiarum & absurditatum. Et verò satis est ad ejus refutationem, quod omni careat argumento: Quod sane nullâ fulcitum ratione, nec experimento constat, illud vanum est figmentum. Porro & Archeus ille totus est fictitius ac fabulosus. Utque phantasiâ eo nomine intelligas, non est phantasiæ Spiritus vitales fabricare. Nec satis constat, quid spirituum vitalium nomine Helmontius intellectum voluerit. Virus pestilens porro excipi primū sero sanguinis, nec ratione nec experiētiâ est compertum. Multò minus est compertum, quod virus illud nihil possit in corpus nostrum nisi perterritâ phantasiâ. Imò vero experientia multiplici est notum, pestilentes morbos natos in ijs, qui nullo terrore fuerunt affecti, imò in ijs qui de Peste ne quidem ente cogitaverunt. Saltem bruta animantia vetat pestis idæas sibi non possunt formare, & tamen peste sæpius corripuntur. Quod si Helmontius voluit (ceu ejus mentem exposuit Kircherus) venenum pestiferum confici ab Archeo & in Archeo ipso hære, adhuc obscurior est sententia. Quasi scilicet phantasia ipsa possit reddi venenata per imaginationem. Sed & ipse Helmontius vult, venenum pestilens etiam post mortem superesse, atque ita contagio nocere posse: impossibile autem utique est, phantasiâ jam per mortem è medio sublata phantasmata sive imagines phantasiæ superstites esse.

#### XXIV.

Etiam Helmontianis itaque delirijs sepositis, proximum est uti porro indagemus, unde nam virus pestilens  
exter-



externum proveniat, & quomodo corpora humana inficiat. Non dubitandum vero est, frequentissime corpora nostra ab aëre infici. Id enim experientia docet multorum seculorum. Nihil sanè commodius ad propagationem pestilentis veneni aëre est: ut qui si fuerit infectus, & per os aliasque vias corporis patentes, aut per poros cutis insensibiliter ingressus, aut attractus, fermentum pestilens sanguini facillime communicat; quod deinde pestilentem in corpore fermentationem excitat, atque Pestem causatur.

#### XXV.

Suscipere autem Aer potest pestilens venenum non quidem immediate à cœlo & astris, ceu jam tum supra probavimus; faciliè tamen ab inferioribus. Quanquam non negaverimus astra pro diversitate motus & *οὐζυγίας* varias in aëre mutationes efficere, atque ita & producere putredinem aliquam posse aut corruptionem in ejus qualitatibus primis, imò & posse concitare halitus subterraneos virulentos, qui aerem queant inficere.

#### XXVI.

Potest autem Aër multis de causis recipere virus pestiferum: per autem est verisimile, omnium frequentissime id fieri ab exhalationibus pestiferis subterraneis. Utique enim certum est ex sulphure, ex argento vivo, & arsenico similibusque noxios fumos exhalare: aerem item diu conclusum in specu aut foveis, si non perspiret, homines subito posse necare, quod exhalationibus subterraneis refertus sit. Quamvis enim tales exhalationes in apertū in prodeuntes non semper solent esse noxiæ propter paucitatem, & quod ventis longe lateque trajiciantur; interdum tamen ea est illarum copia atque malignitas, ut diu hæreant. Peregre de exhalationibus illis differuit *Casalpini* l. 1. de *medicis c. 4.* & quidem usque adeo eleganter, ut sermo ejus

merca-



mereatur hic à nobis repeti: Aliquando in Peste diffunditur exhalationis malignitas in longinquum, ut totas provincias inficiat, quod tetigisse videtur Thucydides, cum in Peste Atheniensium inquit: Forte per continuum ex Æthiopia quaedam fluxere putredinis contagia. Oriri autem hæc ex pravâ evaporatione subterraneorum illud argumento est: Nam quæ ex cadaveribus putrescentibus in prælio, aut ex palustribus putrefactis fiunt, loca tantum vicina afficiunt, non universas provincias occupant. Oportet igitur universaliorē causam esse; aut cælum, ut quidam putant, aut dispositiones terrestres, quam sententiam sequitur Avicenna. Quamvis enim cælum sit prima causa omnium alterationum, quæ hic fiunt, longinqua tamen est, ut inquit: dispositiones vero terrestres propinquæ sunt. Corrumpi autem aërem à multitudine exhalationum, indicant signa Pestem prænucciantia: ut cum in aere apparent multæ impressiones ignis, stellæ cadentes, cometa & huiusmodi, & cum turbulentus est Aër, & veluti pulvere infectus: significant enim multam evaporationem præter ordinem naturalem. Nam quemadmodum constitutio pluviosa aut ventorum spiratio aliquando universalis videtur, multas provincias accupans, ita idem contingere potest in constitutione pestilenti, ut terra afflet universim pravæ evaporationes diu conclusas, unde aëris turbulentia & malignitas sequatur. Quoniam vero omnia metallica terrestria sunt, ut explicatum est, etiam evaporationes eorum terrestres sunt: atque ob id plerumque post magnas siccitates sequuntur Pestes, & succedente constitutione australi, quæ materiam putredinis foveat: ut patet in constitutione descripta ab Hippocrate 3 in 3 Epidem. Fit autem plerumque excessus pravæ exhalationis in terra motu. Ex concussione enim tali necesse est commoveri latentes in terra visceribus evaporationes: pro diversitate autem ipsarum, varia genera morborum oriri: non enim iidem in omni peste vagantur.



Præter hanc ab inquinamentis aut exhalationibus pestiferis aëris corruptionem, vulgò à doctissimis Medicis creditur, propriâ quadam aëris putredine posse pestiferum virus in aëre nasci. De quo modo generationis pestilentium morborum ita philosophatur doctissimus Scherbius 1b. 39. 40. & 41. *Sequitur secundum, quod itidem à cælo inferri solet: sed alio tamen modo. Non enim jam halitibus putridis pestilens est: sed potius, quia aut constitutiones plane inter se non responderunt neque τὰ ὁμοία ὁμοίως sese habuerunt: aut quia diurnâ caliditate & humiditate, sive iucitatoribus ventis, aut saltem alterutrâ intemperie corporibus humanis vi putrefaciendi pestifer factus est. 40. Vbi tamen diligenter videndum, in Austrinis præsertim constitutionibus, quæ cæli constitutio eam vel antecedit vel sequatur. Frigidam & siccam antegressam forassis emendabit: ut & contrâ illa quoq; huius remedium esse potest. 41. Videndum etiam illud, Non semper eo ipso tempore, quo Aer intemperiem aliquam graviolem nobis imprimit, pestilentibus morbis nos protinus urgeri, sed in aliud tempus interdum eos proferri: quod aliquando nihil malifacit, aliquando vires superioris exacuit, aliquando debilitat. Hæc ille. Et si verò non temere dissentiamus à viris eruditione præstantibus, hic tamen cogimur saltem ἐπιχειν: idque quoniam quidem satis compertum sit, quod ex intemperatis illis constitutionibus aëris morbi varii Epidemii nascantur, vere pestilentes tamen morbos aliquando sic ortos esse nulla firma experientia demonstraverit. Et verò longè frequentius utique fuerint morbi pestilentes, si illi hinc queant oriri: cum tales constitutiones depravatæ septentrionales hæc regiones frequentissimè infestent. Quicquid huius sit, nos malumus in dubio id relinquere, quam certi aliquid asserere.*



Præter Aerem porro & Victus potest pestilens virus hominibus facile communicare. Videtur tamen alio id modo fieri: nempe non immediate, sed potius mediate, hoc est dum à pravo victu sensim in hominibus nascitur insignis humorum putredo, quæ facile potest virus pestilens excipere, atque illi esse quasi pro commodissimo fomite. Et verò pravus at communis victus, quo in annonæ defectu in urbium obsidionibus & in castris miseri mortales uti coguntur, dum famis urgente rabie, quodlibet quod fors suggesserit, in nutrimentum (uti sunt interdum forte mortui canes, feles, mures, asini & equi, herbarum radices perniciosæ, panis ex glandibus, fursuribus, aut corrupto frumento confectus) assumitur, mirum non est, si ex depravatis alimentis depravati in humanis corporibus humores, ad pestis genesis apti vel hujus virulentæ putredinis receptores, nascantur. Eademque carniū est ratio: nimirum alimento altius se insinuantē, humores necessariò depravantur; accedente vero externi aëris simili depravatione, laborantis jam interdum satis sinceri, quidem, caliditate tamen, quæ promover putredinem, multa laborantis, continua inspiratione, humores jam dispositi naturæ quadam similitudine aëri juncti, eam tandem quam diximus funestam pestis foeturam excludunt. Idem de fructibus in genere dicendum; tantò hæc rerum constitutione periculosioribus, quanta putredinis vitiosæ capaciores sunt. Exemplum hujus rei insigne videre licet apud Plutarchum in *vita Alexandri Magni*. Sic Rolandus Capellutus lib. de Peste scribit: *magno regnante calore, ex commestione carniū porcinarum mille hominum sunt infecti ac perierunt*. Narrat quoque Athanasius Kircherus ex Gregorio Turonensi; sub Felice Papa & Ze-



& Zenone Imperatore post famem incredibilem, secutam esse Pestem sævissimam, quæ in ultionem offensæ divinitatis totam Africam unâ depopulatione vastavit; Hinc sane jam olim apud Græcos abiit in proverbium: *μετὰ λιμῆς ὁ λοιμός.* XXIX.

Cæterum quomodo sive aëre sive victu mediante, queat Pestilentia excitari, ex hisce quæ diximus, satis est manifestum. At cum vulgo sit notissimum, per sæpe hoc malum ex locis cum vicinis, tum dissitis aliò posse transferri, nullo aeris nullo victus vitio (cujus rei tristia exempla ante hos duos annos vel vicinia nostra nobis dedit satis luculenta) ratio nunc postulat, ut ad causam pestis propagantem contagium scil. accedamus. Etsi enim (ut Thest. 6. dictum est) multi doctissimorum medicorum dubitaverint, an omnis Pestis sit contagiosa; posito tamen non omnem Pestem esse talem, verissimum tamen est, ex omni morborum genere hunc morbum esse contagiosissimum, & in hoc causæ morbificæ communicationem cum aliis omnium maxime esse perspicuam. Dicimus autem contagium esse, medium sive seminium è corpore ægro emissum, per quod affectus similis alii alicui corpori, quod habile est ad recipiendum similem morbum, communicatur. Medium illud ve est vapor, vel impurus & inquinatus humor, vel sordes, vel excrementum quoddam, quod in corpus aliud similem affectum producere potest. Est vero nulli non notum, tria ad contagii propagationem pertinere. 1. Agens primarium seu corpus crassum contagem efficere potens. Secundo ipsum illud quod communicatur: & Tertio quod à communicato patitur. Agens illud primarium semper laborat eo affectu qui in alio corpore excitari debet. Nimirum non ipse morbus sed seminium quasi morbificum per contagium proxime com-



munificatur, atque sic similis specie morbus in patiente  
producitur. Medium per quod in aliud subiectum indu-  
citur contagium, *μίασμα* est seu morbidum aliquod ef-  
fluvium mole quidem exiguum at virtute longe potentis-  
simum. Tenue illud ac subtile est, ut facile queat penetra-  
re; interim alicujus lentoris particeps, ut corpori infi-  
ciendo aliquandiu possit adhærere. Communicatur au-  
tem illa *ἀποpegιά νοσσηγιά* alteri corpori aut mediate aut im-  
mediate. Immediate, cum inter corpus infectum & infi-  
ciendum nullum intercedit medium, sed simpliciter se  
contingunt extremitatibus; mediate sive in distans, quan-  
do aeris intermediarii præcipue vehiculo *μιάσματα* in eo-  
dem contenta communicantur. Aer namque ubi ab infe-  
ctis corporibus contagii seminum suscepit non solum  
per vias corporis patentes sed etiam per poros cutis se in-  
sinuant. Fomitem autem contagii suppeditant corpora  
maxime porosa & foraminulenta, in quibus facillime &  
recipiuntur & delitescunt *μιάσματα*. Talia vero imprimis  
sunt, linteamina, ac vestes è lino lanâ aut gossypio confe-  
ctæ, plumæ item ac pelles animalium pilosorum, in qui-  
bus satis diu isthæc posse asservari experientia testatur.  
Præter hæc porro etiam alia quam multa: de quibus ope-  
rose & doctè disserit Athanasius Kircherus *sect. 2. c. 4.* Ter-  
tium contagii requisitum est corpus, quod sibi imprimi  
contagium patitur, illudque non quodvis obvium, sed  
certum & determinatum, aptum atque dispositum. Eo-  
que cum alios facilius aut difficilius corripitur peste videa-  
mus, illud vel in cordis nativum robur, vel in analogiam  
corporum inficiendorum cum infectis merito referen-  
dum est. Et sane multa experientia est comprobatum,  
consanguineos à consanguineis facilius affici: indubie  
quod similem plærumque naturæ habeant affinitatem,  
unde



unde & sæpius integras familias hac luce delectras esse constat.

XXX.

Antequam hinc discedamus, attingendum à nobis & illud est: utrum solius imaginativæ seu phantasticæ potestatis energiâ, pestis contrahi possit: haud secus ac mulieres gravidæ foetibus suis earum rerum, quas aut vehementi vi imaginatæ sunt, aut ardenti desiderio deperunt, in exteriori cutis superficie inprimunt characterissimos. Verum enim vero licet affirmemus & nos illud Aristotelis *libro de motu cap. 6.* quod phantasmata non solum corpus alterent, sed quodammodo tale quid fiant, qualis res ipsa est: quin imò ut addit Amplissimus Dominus Præses in prorsus aureo suo libello de Calido innato *cap. 24.* *Si calor vel extra corpus speciem lucis potest accendere, ipsa met autem luce animi phantasmata longe altioris sint virtutis, non magis admiratione dignum est, quàm phantasmata calidum innatum cordis possit immutare, quam qui calor possit à luce accendi:* nulla alia externa causa adjuvante pestem excitare posse haud credimus: idque cum primis quod hætenus experientia non sit compertum, vel unquam contigisse. At vero phantasiâ, vel metu aut terrore effici, ut facillime quis possit corripî à pestifero veneno, quod alias potuisset repellere, omnino concedimus. Metu scilicet & timore subito intus abripitur quod fortasse delituit adhuc in habitu corporis: cum quæ calor natus sic fiat debilis, non ille potest resistere ceu par erat virulentix. Si nimirum subito quisquam alium sibi de peste suspectum aut suppellectilem infectionis labe contaminatam attingat, aut retum & virulentum odorem percipere se existimet, mox ingenti horrore de contagione conceptâ sollicitus, concutitur, jamque veluti de vita actum suspicans, miris modis agitur: unde inquietus & immensâ percussus tristi



etiam mortis imaginem semper præ se fert, phantasticæ facultatis violentia omnibus passim humoribus conturbatis: tandem animo ad ea inducti terroris ludibria dispellenda minus sufficiente, cor metu contrahitur, atque ad extremum vitalis ignis ex mœrore & melancholicæ fuliginis adspiratione quasi condensatur, extrinsecus haustum semen pestiferum in intimis recessibus excipit; hoc vero mox summo furore totam corporis œconomiam evertit. Imaginationem quippe terror, terrorem melancholia & mœstitia cordis trahit; unde condensato veluti igne nativo facile recipere potest extrinsecus adveniens virulentum contagium: quod semel intromissum insita sibi virtute ac proprietate calidum vitale imbuit. Facultas Imaginativa igitur ex se & suâ naturâ pestis effectrix non est, sed solummodo humores dispositione quadam habiles reddit; quibus dispositis externum & peregrinum virus in iis suas, ad totius humani corporis ruinam, machinas explicat & reliquum totum sibi simile reddit.

### XXXI.

Cæterum de causis Pestis fortè satis prolixè actum est. Differentiæ autem Pestis vel ab ejusdem causis vel ab accidentibus petuntur. Ratione namque causarum, alia Pestis ortum trahit ab aere, alia à victu, alia à contagio alia à veneficio alia ab alia causa. Ratione accidentium: alia gravis est & magna quæ multos non solum invadit, sed eos pene omnes paucis exceptis jugulat. Alia levis, quæ nec tam multos corripit, nec etiam quos invalit omnes interficit. Alia febrem aut alios morbos conjunctos habet, alia est sine febre aut sine illis aliis. Mitto differentias alias: cum possint ex iis quæ jam tum attulimus facile repeti.

### XXXII.

Medici non eo fine Pestis naturam investigare student,



dent, ut duntaxat, quid Pestis sit, sciant, sed ut imminen-  
tem præcaveant & præsentem tollant; id vero præstare  
non possunt, nisi & eminentem prævideant & præsentem  
agnoscant: necessarium proinde est signa Pestilentia  
tum imminētis, tum præsentis intelligere. Ea autem  
sunt vel diagnostica vel prognostica. Illorum verò alia  
sunt Pestis imminētis, & dicuntur remota; alia præsen-  
tis & vocantur propinqua. Remota Pestis signa vel ab  
eiusdem causis, vel ab effectis desumuntur. A causis pe-  
tita signa sunt; si aeris aliqua anomalia præcesserit, si mul-  
tæ impressiones ignitæ, stellæ cadentes, aut cometæ appa-  
ruerint; si aer turbulentus & veluti pulvere infectus sit;  
si aquarum inundationes fuerint: si pravæ ex terræ spe-  
luncis aut cavernis prodierint exhalationes; si terra fue-  
rit mota; si nebulæ malignæ, aut pluviae inusitatae, fre-  
quentes fuerint: si cadaverum insepultorum ingens ali-  
cubi fuerit copiâ; si fames aut pravus victus urbem aut  
regionem aliquam diu incommodaverit: si denique ma-  
lum pestilens in loco nobis vicino grassetur.

### XXXIII.

Ab effectis petita sunt marcor plantarum germinum-  
que. Nam quæ ex terra proveniunt, teste Hippocrat. *l. de  
locis*, ipsius terræ naturam sapiunt, & sequuntur, vitiatâ  
itaque terrâ, vitiantur omnia reliqua, quæ ab eadem pro-  
ducuntur: quod & Galenus noster notavit *lib. de element.  
cap. 9.* Huc facit fungorum ac boletorum varii generis  
exoticorum, vermium ac insectorum, bufonum item &  
ranarum caudatarum uberior generis: si mures aliave ani-  
malium genera in terræ latibulis degentium solita, vel  
aves item nidos ac pullos suos deserant: si ranæ aut pisces  
passim in aquis mortui supernatent: si gravidæ mulieres  
frequenter levi de causa abortiant. Futuræ tamen pestis  
hoc



hoc indicium magis confirmare videntur varii communes morbi maligni, publice grassantes plurimosque interficientes, quales fere sunt febres petechiales, variolæ ac morbilli, anthraces & carbunculi, dysenterix, pleuritides, anginae, hepatides omnes epidemiae: fidem enim faciunt isthæc omnia malignitatem aliquam communem sensim nobis obrepere. XXXIV.

Atque hæc quidem fere sunt signa Pestis imminentis. Pestem jam præsentem quod attinet, cum Pestis variorum morborum larvam instar alicujus Prothei sæpius induat, antequam in multos sævitiâ suâ debachetur, vix certum aliquod signum pathognomonicum nobis suppeditat; Quod si tamen quis etiam unum observetum symptomata pestilentium affectuum, uno quasi momento, nulla præeunte manifesta causa, pati, Medici prudentis fuerit de Peste suspicari. Si vero talia symptomata jam simul multos invadant, & illorum quos invasere plerique, pereant, certo est indicio, Pestem à causarum supra datarum aliqua communi provenire, atque sic pluribus etiam posse communicari. XXXV.

Reliqua Pestis signa vel ab ejusdem causa: vel ab actione vitali, animali, naturali læsâ: vel ab excretis: vel denique à mutatis qualitatibus deducuntur. A causa Pestis quod proditur signum est contagium. Adeo certe Pesti conjuncta est contagio, ut ipsemet Mercurialis *l. de Peste c. 3.* adactus fuerit affirmare, omnem Pestem esse contagiosam. Non tamen contagium est Pestis in quarto modo proprium: cum plurimi alii dentur morbi contagiosi qui tamen pestilentes non sunt. Interea tamen cum Pestis ex omni morborum genere illam per contagium se propagandi potentiam quàm maximè habeat, si positis aliis circumstantiis alios ab aliis clanculum infici videamus, jure merito de Peste suspicio oboriri debet. XXXVI.



## XXXVI.

Longè certius vero signum pestis petitur ab actione læsa vitali. Nam si nulla præcedente causâ manifestâ subita ingruat virtutis vitalis dejectio, quæ deinde animi deliquia, syncopen, cordis anxietatem, ejusque palpitationem, crebram at difficilem respirationem post se trahit, cor maxime affici certissimum est: ut pote cujus virtus longe magis hîc quam in ullo alio morborum genere collabascit. Hoc sane Peste affectorum pulsus parvus obscurus & languidus frequens & inæqualis manifesto docet. Nec enim par est assentiri Helmontio, qui ex pulsu Pestem præsentem negat cognosci posse: nisi id intellectum voluerit, de solo pulsu, aliis signis sepositis.

## XXXVII.

Non rarò porro Animalis & Naturalis facultas multum laborat in Peste. Sic interdum peste correptos vigiliæ excercent, interdum in somnum est propensio involuntaria, interdum & capitis dolor, deliria vertigo tremor, convulsio & id genus alia incommodant. Quandoque inappetentia, nausea, vomitus vehemens sitis, singultus, cardialgia, colica, dysenteria simul affligit: signum autem est, materiam malignam ad ventriculum & intestina ruere. Humoribus præterea à latente virilentia corruptis, febres plærumque foris quidem mites, intus intolerabiliter ardentes producuntur. Vnde sitis consequitur inexhausta: quod & in Peste Atticâ memorat Thucidides: prorumpuntque in exterioribus partibus exanthemata, maculæ, bubones, & carbunculi.

## XXXIIX.

In excretis etiam pro varietate humorum varia redduntur. Urinæ namque non raro sanorum plane similes sunt; nonnunquam tamen apparent & crudæ, nonnunquam



quam turbidæ ac crassæ , interdum acres biliosæ ac malæ olentes, aliquando rubræ, lividæ, nigræ & oleaginosæ. Quod argumento est ex urinis certum pestis indicium peti haud posse : quod etiam Helmontio est observantum. Sudores sæpenumero sunt frigidi , foetidi nihil levantes. Alvinæ excretiones fiunt parvæ foetidi male ac varie coloratæ acres. Adest per frequenter & stillicidium sanguinis acris ex naribus. In qualitatibus mutatis signa sese hæc produnt: varia exanthemata variæque maculæ sparsim in cute erumpunt: corpus totum malè olet , foeditumque quid expirat : Facies cadaverosa apparet ac vere Hippocratica: Oculi vivido suo splendore destituuntur flentium oculis non absimiles : Lingua est nigra scabra & sicca , sapore falso vel amaro vel alio ingrato atque exotico vitioso inbuta. Horum signorum vero quædam cum aliis morbis itidem sint communia, non tam sunt creta, etsi quædam huic inspecie morbo magis propria sint.

### XXXIX.

Prognostica si in quo alio , certe in hoc morbo tanquam omnium perniciosissimo & fallacissimo plane sunt incerta, atque fluxæ ac malæ fidei. Attamen videtur minus periculi imminere, si vel ex prava victus ratione natales trahat, aut quoquomodo per contagium sit propagata, quam si ex corrupto ac pestifero aere producat; cum ejusmodi æris constitutio per se longe sit gravissima, maximasque mortalium strages edere soleat. In genere porro illa pestis minus letifera merito creditur, quæ signa pauciora aut magis obscura obtinet, atque virium majus aliquod robur conjunctum habet, ut spes vitæ major supersit. Vires igitur si non penitus sint dejectæ: si pulsus non sit adeo debilis, sed in magnitudine celeritate ac frequentia à naturali mediocritate non multum declinet; si tumores pestilentes subito



subito & confertim in loco ignobili & a principe parte remotiore, cum symptomatum aliquâ remissione, prorumpant, citoque suppurentur, bonique sint coloris; si medicamenta, cibus item & potus vomitu non rejiciantur, si sudores cum allevatione fiant; bono id est signo. Contra si magna Virium sit debilitas; si tumores non satis erumpant, vel circa cor aliamve partis nobilis regionem emergant, aut mox iterum evanescant: si animi deliquium aut cordis tremor infestet; si vigiliæ deliria aut convulsiones incommodent: si vomitu omnia rejiciantur; si extrema frigescent præcordia vero intus ardore flagrent: si sudor sit frigidus, aliave febrium malignarum symptomata ad sint: malum.

#### XL.

Cæterum de signis pro instituti ratione fortè plus satis: Ad curationem itaque tandem est progrediendum. Verùm cum illa duplex sit, Prophylactica & Therapeutica; Medici autem officium sit, non solum Peste correptos liberare, sed sanos quoque ab eâ tueri, de prophylaxi primo loco dicemus: præsertim, cum facilius longe tutiusque sit pestem præcavere, quam eandem præsentem ex corpore expellere. In memoriam verò ante omnia revocandum est id quod supra diximus: Pestis causam aliam esse supernaturalem aliam naturalem. Curationem itaque nunc tradituri proxime sumus non illius prioris, sed alterius posteriori; generis. Consistit igitur naturalis præservatio post imploratam opem divinam partim in duobus: nempe in causarum Pestem producentium remotione, aut si illarum causarum præsentiam effugere penitusque evitare non liceat, saltem in eo, ut illarum vis infringatur, & corpora ad recipiendum pestiferum venenum minus disposita reddantur. Inter alias verò causas cum primas te-



neat aër, sedulo allaborandum, ut quantum fieri potest, vel mundus conservetur, vel si jam tum infectus sit, ab inquinamento repurgetur. Illud, causarum aërem inficientium remotione fit. Si ergo exhalationes è terræ cavernis evaporent, arctissime quoad licet claudantur; si à cadaveribus, profundissime illa sepeliri oportet; si ex aquis putrefactis aut stagnantibus, puræ ac celeri lapsu currentes superinducantur, & fluidæ reddantur. Plateæ ac viæ publicæ ab omni sterpore, fimo aut foetore liberæ sunt. Si vero Aërem jam infectum esse contingat, exemplo Hippocratis & Acronis maximorum Medicorum, igne purgetur, ex pini, quercus, lauri vel Junipere lignis: vel ex herbis Lavendula, Salvia, Rosemarino, Ruta: ex baccis vero lauri & Junipere. Ex Sulphure ex nitro & pulvere pyrio suffumigia fiant, ut quæ magnam vim aërem alerandi & purificandi vim habeant. Bombardæ item, præsertim majores frequenter explodantur: quoniam & motus ille vehemens discutit incumbentem malignum aërem, & vis fumi consumit *μικροπυρρα* pestifera.

## XLI.

Porro si Pestis publice in loco aliquo grassari incipiat, omnia cum loci istius incolis commercia & conversationes prohibeantur, atque inde advenientes sævissime abarceantur. Conventus item publici parcius celebrandi, nundinæq; in talia incidentes tempora interdiciendæ penitus. Mendici similesque errones in urbem ne intromittuntur, intromissi vel ejiciuntur, vel certo loco continentur: si tamen forte quis præter opinionem inficiatur, à reliquis nondum infectis cum omni suppellectile separandus ædesque suffumigiis mundandæ. Nihil horum quidem in Græcorum Latinorumque veterum medicorum monumentis suavis reperire est; omnino tamen hæc agenda sunt ad evitandum



contagii progrediuntur : cuius vis in Pestilentia videtur antequis illis minus fuisse cognita.

XLII.

Quod si vero per contagium jam latius se diffuderit malum , tutissimum erit locum infectum cum alio & quidem longe dissito commutare : quod & alias statim circa prima initia omnium est securissimum. Cæterum cum omnibus vel ratione officii aliarumve circumstantiarum illud non liceat ; corpus imprimis muniendum & ab omni impuritate liberandum , ne venenum pestilens facile recipiat, aut si receperit fortius resistere possit. Quod in universum bona diæta ac medicamentis intus & exterius adhibitis efficitur. Nec enim est quæ ad illa confugimus , quæ Romæ ferunt nuper fuisse ab aliquibus laudata : ut nempe quis includat sese vitreo musejo , aut frontem & os obvellet rostrato quodam schemate ; ad aëris scilicet noxam evitandam. Partim enim inepta illa sunt , & stolidæ : partim obsunt potius quam prosint.

XLIII.

Diætæ nomine intelligimus legitimam administrationem sex rerum non naturalium : ut sunt Aer , cibus & potus, somnus & vigiliæ, motus & quies, excerta & retenta, & animi perturbationes. Aer quomodo publice sit purgandus aut emendandus , superius diximus. Magnam vero rationem aëris esse habendam tempore contagii, venerandus jam tum olim ipsemet Hippocrates *l. de natura humana* his verbis inculcaverat: *primo providendum, ut quam paucissimus aëris influxus in corpus ingrediatur. Secundo ut ille ipse quam peregrinissimus existat* (hoc est interprete Galeno) *nullo inquinamento corruptus, sed sit purus attenuatus odoratus & salutaris.* Sic & Avicenna *lib. de Peste cap. 4* bonis odoribus spiritus maxime oblectari a putribus vero lædi, scribit. Privatus



rim ergo varijs suffutibus ex storace, ladano, myrrha, santha-  
lis, thure, succino linguo aloes, floribus arantiorum, rosa-  
rum, pulvere Cypri alijsq; similibus, aut etiam vaporibus exa-  
quis odoratis acetisq; bezoarticis, excitatis commode cor-  
rigitur. Sugillat quidem Helmontius suffumigia ejusmo-  
di, idque quoniam etiam odorata illa possint excipere con-  
tagiam pestilens, quodque illis suffumigijs, sæpe nihil effi-  
ciatur. At verò hæ objectiones nullius sunt momenti, ut-  
pote quum talia possint objici omnibus quæ in Peste adhi-  
bentur remedijs.

#### XLIV.

Victus leges exquisitæ cum raro servantur, aut serva-  
ri possint ab omnibus, temere is mutandus non est. Interim  
angue peius & cane vitandus qui facile potest corumpi, aut  
pravum aliquem succum suppeditat corpori. Contra verò  
quorum fert conditio optimo, & qui boni sit succi facilisq;  
concoctionis, utantur. Talem suppeditat fere ex carnum  
genere virulina, vervecina, hædina, caponum, perdicum  
gallarum, columbarum, turturum, alaudarum ac similium  
montanarum ac sylvanticarum avium; inter pisces lucij, por-  
cæ, funduli, aurata, cæterique pisces saxatiles reliquis me-  
rito præferuntur; Panis inter albissimum & nigerrimum sit  
quodammodo intermedius, bene fermentatus, mediocri-  
ter salitus, probeque excoctus. Potus sit naturæ familia-  
ris, non varius, neque multis foecibus abundans, sed de-  
foecatus & ad sustentationem non voluptatem sufficiens.  
Ex herbis, borrago buglossum acetosa in jusculis decoctæ  
Ex fructibus mala punica acida, mala citria, aurantia & cy-  
donia propter vim diureticam & bezoarticam laudantur.  
Imprimis vero laudanda tali in constitutione est sobrietas  
quâ solâ, teste Aliano *l. 5. variar cap. 15.* Socrates in ferocissi-  
ma Peste Atticâ immunem se præstitit. cui plane ille in cibo-  
rum



borum varietate luxus adversantur dum corpora nostra variis cruditatibus replet. Condimenti tamen loco cibis corroborantia cor & venenis resistentia adiici possunt.

#### XLV.

Vigiliæ excedentes (eo quod valde desiccant humores incedunt, viresque plane deliciunt) morbo huic plane sunt contrariæ summus nocturnus vires restaurando & corpus humectando humorum inflammationem impedit eoque valde conducit, quare omnia se habeant moderate: In motu & quiete mediocritas requiritur. Quies tamen hoc in morbo videtur præferenda, quod in motu corporis vehementiori magis crebra requiratur respirandi necessitas, unde aër infectus facile potest ad ima cordis penetralia adduci; tum quia hoc pacto facile humores commoventur atque in iis incendium inducitur.

#### XLVI.

Excrementa corporis nisi debite ac naturaliter foras eliminantur, sed vel errore aliquo aut quovis alia de causa substituerint, variorum morborum causas producere posse experientia probat. Idem autem hic evenire posse non dubitandum. His vero qui hac ratione laborant, aut sorbitivunculis ex emollienti decocto, aut suppositoriis, aut clysteribus (si opus fuerit) omnino succurrendum.

#### XLVII.

Animi perturbationes hic multum posse, superius quoque à nobis dictum. Neque mirum (ut cum Heurnio loquamur) quod subitaneo metu pestis perculsi eam in se pelliceant: Spiritale enim venenum syntimoria quadam se vitalibus Spiritibus consociat. Egimus vero jam tum supra altius de vi & efficacia metus ad pestilentium affectuum producendam pestem: eoque non opus est isthæc nunc repetere. Quantum igitur possibile, omnes attentæ cogitationes de Peste animo excutiantur

#### XLIIIX.



Sequitur nunc ut de materia temediorum quam Chirurgia suppeditat, dicamus. Laudant sane plurimi doctissimorum medicorum usum cauteriorum & fonticulorum, tanquam quibus in gravissimis pestilentis plurimis sint servati, eò quod hoc pacto pravi humores & ad corruptionem idonei commodum ad corporis peripheriam retrahantur. Nec sane id sine causa. Operæ fuerit pretium hic audire quæ de cauteriorum & cantharidum usu ad *περὶ οὐλαξίν* differuit Kirchnerus sect. III. cap. 4. Cauterium (ait) præpotens esse ad vitandum pestem remedium omnes fere fatentur Galeni sectatores; ita quidem ut quod Mercurialis de Peste Venetæ, id ego de Romana quantum ex Medicorum fide dignorum relatione mihi innotuit, asseverare queam; nullum huiusmodi naturæ signatum spiraculis, peste invasum fuisse, nisi forsitan nonnullos dissolutioris viræ Epicuri de grege porcos. Quosdam tamen invasos continuis inguinum, femorum, brachiorumque frictionibus adhibitis, insidiantis veneni impetum per cauteria tandem auxisse. Novi Medicum dum Nosodochio in pestiferorum curam deputaretur, quinque sibi prius cauteriis iniustis, aliisque præservativis instructum, junctâ imperverriti pectoris magnanimitate, inter medios morientium cœtus, integrum incolumemque semper exstirisse. Sunt & Medici qui Peste jam infectis ultimum remedium existiment cantharidum applicationem, compluresque hoc medio, potentique medicamento afflicta, veneni pestiferi vi, à cordis arce avulsa, pristinae sanitati restitutos, quod non improbo. De venæsectione multi dubitant an hic locum habeat; plurimi id negant, affirmant alii, Verum nos cum prioribus negativam tenemus, nisi forte ab insigni plethora periculum immineat. Aliàs enim vires summopere exinde debilitari vel ratio suadet. Vires tamen integræ & firmæ, si in ullo alio morbo, hic quam maxime desiderantur.



Purgationem fore proficuum ratione præservationis, concedimus; præsertim si corpus plurimis vitiosis humoribus sit refertum. Ita tamen, ut à vehementibus ac validè electivè purgantibus, qualia ex colocynthide aut scamoneo præparantur, à chymicorum item mercurialibus & antimonialibus, plane abstineamus; cum talia venenum pestilens, quod fortassis receptū est & adhuc latet, minime ex corpore deturbare possint; sed potius humores agitando in infimum ventrem protrudant. Vnde insignis aliqua diarrhœa & quæ hanc excipit virium dejectio, facile insequitur, aliaq; prava symptomata accersuntur. Leniora, tamen, qualia sunt Folia Sennæ, Agaricus, Rhabarbarum, Syrupus Rosar. solativ. Electuar. lenitiv. Diacathol. pillulæ Ruffi, tutius longe usurpantur; idque ad corporis lenem à putridis humoribus evacuationem.

## L.

Corpore ad impuritatem sic rite purgato, sudorem aut idoneis medicamentis promovere studeamus, aut exercitiis moderatis, ut si forte inquinamentum aliquod in corpore fuerit receptum, per diaphoresin expellatur. Et vero valet diaphoresis, non minus ad præcavendum, quam ad expellendum pestilens venenum. Eoque expedit etiam ad præcavendum, frequenter usurpare illa quæ leniter ad habitum corporis propellunt per *ΝαΦόρησιν*. Cum primis verò peste jam nonnullis affectis ad alexipharmaca post Deum optimum maximum confugiendum est. Quæ tamen cum potius experientia quam ratione sint inventa, maxime ex iis eligimus ea, quæ longo rerum usu ac fida experientia sunt comprobata, novis ac gloriosis nonnullorum secretis plane posthabitis; experientiam enim facere per hominum mortes, iniquum & abominandum est. Illorum autem è



Simplicibus hæc aliis præferuntur: Radices Angelicæ, Zedoariæ, Tormentillæ, Gentianæ, Scorzonæræ, Valerianæ, Vincetoxici, Dictamnialbi, Succisæ, Imperatoriæ, Olsnitii, Heleni, Iridis, Calami aromatic. Herb. Acetosæ Carduibened. Dictamni Cretici, Rutæ, Scabiosæ, Scordii, Ulmaræ. Flores Hyperici Calendulæ. Baccæ Juniperi, Iuglandes, mala citria. Lignum Aloes, Santalor. Terra sigillata, Bolus Armen. Lapis Bezoar. Cornu Cervi, Unicornu, Camphora, Crocus, Macis. Ex compositis hæc magis sunt famosa: Theriaca Andromachi, Mithridatum; Confect. Liberantis, Electuar. de Nucibus, Theriaca diatefferon, & de Citro. Merentur vero de hisce omnibus cum primis legi, quæ magno studio in unum congesserunt singularibus libellis Antonius Snebergerus & Henricus à Bra, præstantissimi & diligentissimi medici. Recentiores his postmodum adnumerant Electuar. de ovo, de gemmis, Camphoræ Kegleri-Theriac. German. Tabernæ montan. Diascordium Fracastorii, Pulv. Cæsaris rubeum & gryseum, Saxonici Confection. Macis Elixir pestilentielle Crollii & Tychonis de Brabe, item Electuarium Orvietani & similia. Ex quibus tam simplicibus quam compositis, pro cujusvis prudentis Medici intentione ac scopo, cum ad internos, tum ad externos usus, varia medicamentorum genera componi possunt.

## LI.

Discrimen tamen omnino faciendum esse temporis, ætatis, sexus, aliarumque circumstantiarum, summè necessarium est. Quare iis qui temperamento sunt calidiore, juvenilis ætatis, tempore æstivo, minus calida, sed calidiora aquis & syrupis acetosis aliove modo temperata, exhibemus, quæ caliditatis excessum infrigant. Infantes etiam ac gravidæ, calidiora atque fortiora medicamenta non ferentes, lenioribus atque temperatis curantur, additis duntaxat, quæ foetum confortandi vim habent,

## LII.



Quoniam vero cum primis hic est consulenda experientia, magna vero olim laude in pestis præcautione pariter ac curatione versatus est Hippocrates; ex re profecto esset, si quibus ille usus fuit, nos sciremus. At vero nihil in antiquorum monumentis reperire est: præter unum illud, quod ad aeris malignitatem avertendam, vehementem ignem Hippocrates, sylva etiam incensa, excitaverit. Kircherus quidem sect. 3. c. 7. Hippocraticam aliam pestis curandæ rationem describit. Verum illa tota desumpta est, quamvis dissimularo nomine, ex Tumulo Pestis Helmontii. Helmontius verò non illam accepit, ceu par erat, ex antiquis monumentis; sed, si quidem ipsi credimus, ex revelatione alicujus Spiritus. Hinc ita orditur suum Hippocratem redivivum: *Homo quidam, custodi angelo eudæmoni familiaris, oravit ut à Deo impetraret remedium per quod Hippocrates Græcorum pestem popularem curavit. Dixit eudæmon: Hippocrates usus est sulphure sale & pice. Quod responsum post se relinquit obscuritates priores. Hinc factum quod homo ille postmodum dixerit: his temporibus sat dictum esse. Ipsemet Helmontius mox subjungit suam aliquam prolixam explicationem: sed quæ item tota est conficta ab illo homine, & quidem imprudenter ficta. Quod vel ex eo patet: quia non dubitavit docere, sulphur à primo Hippocrate dictum esse ἑῖον, idq; quoniam sulphure curasset pestem: Græcos item pestem primo & deinde omnem febrem cœpisse appellare πῦρ, quod observassent Hippocratem uti igneis remediis ad curandam pestem: quum tamen utraque vox in ea significatione fuerit dudum ante Hippocratem in Græcorum usu, ceu liquet ex Homeri & aliorum scriptis. Quicquid igitur sive Helmontius sive Kircherus habent de Hippocratica curandæ pestis ratione, non nisi commenta sunt, eoque explodenda.*



Licet porro multi in ea sint opinione, virtutem amuletorum ex metallicis præcipuè petitotum maximam esse in hoc malo profligando, ac propterea miris laudibus evelliant appensa Arsenicum & Hydrargyrum: dubia tamen nituntur experientiâ. Imo non dubitamus Arsenicum plane noxium pronunciare: quicquid etiam gloriatur Quercetanus. Commendant alii xenexeton Paracelsi. Sed recte Kircherus, *quoniam id ipsum (ait) immensis superstitionibus refertum est, ei à nemine fides adhibenda est, cum similia vix unquam, sine expresso aut implicito pacto diaboli effectus suos sortiantur.* Recte etiam ipsemet Helmontius, magnus cæteroquin Paracelsi admirator & sectator, non dubitat profiteri, Paracelsum nec naturam nec curationem pestis novisse, eoque in scriptis suis de Peste & inconstantem esse & inaniter gloriosum, nec dignum cui quicquam credatur. An porro majoris fidei sit quod usque adeo vehementer commendat Helmontius, amuletum ex bufone præparatum, merito quislibet dubitet: cum nec ipse ejus viri sit expertus nec alius quisquam post illum, etiam ex Helmontii sectatoribus. Quicquid sane hujus Kircherus habet id totum fide Helmontii nititur: ipsemet ejus nihil est expertus. Quare in exhibitione alexipharmacorum debita nos quidē plus spei reponimus, quam in dubio infidoq; istorum amuletorum usu.

Succedit tandem Curatio quæ pro naturâ, more, celeritate ac malitia morbi, tempestiva non solum, sed omnium accuratissima esse debet. Occasio enim præceps: semel amissa irreparabile damnum post se trahit. Quippe nisi huic malo, statim atque adoritur hominem, quam strictissime obviam eatur, frustra fiunt quæ in posterum conamur, ubi  
venenum



venenum inimis cordis penetralibus jam reledent, aut calidum vitale ferocius debellaverit. Statim igitur atque aliquem hoc morbo correptum esse cognovimus, tutissimum erit, imploratâ prius ope divinâ, ex alexipharmacis enumeratis, appropriatum aliquod remedium eligere ( quantum quidem humana conjecturâ assequi possumus ) quod sine morâ ægroto exhibeamus, & veneno opponamus, quo malitia veneni non solum infringatur, sed simul etiam ex corpore expellatur. Neque id tamen ( ut supra quoque monuimus ) sine discrimine, sed habita ratione naturæ, sexus, aliarumque circumstantiarum. Sic sanè magis mitiora magisque temperata infantibus, gravidis, atque puerperis, propinamus; fortiora admittunt viri aut statæ ætatis homines, quique aliàs hæctenus usi sunt bonâ valetudine.

#### LV.

Post sumptum vero Alexipharmacum diaphoreticum, æger ad sudorem se componat; hac tamen cautelâ, ne nimio sudore vires frangantur. Sudor vero si hoc pacto sequi nolit, vapore aquæ calidæ, cui diaphoretica sint incocta, aliove modo conveniente promoveatur. Finito sudore indusium ac stragulæ mutantur; tum æger lintheis calidis detergendus; ab omni cum primis aëre frigido muniatur, cibisque *εύχρηστοις* atque *εὐπεπτοις* moderate reficiatur. Cum autem non parum sæpe vires à veneno ac sudoriferis debilitari contingat, inter sudandum totiusque adeo morbi decursu, Syrupo vel conservâ violarum, rosarum borraginisbugloss. acetos. Succo Citri Granatorum Ribium, Confect. de Hyacintho, cum aquâ aliquâ appropriatâ, revocillari possit. Naribus aquæ odoratæ, acetæ, balsama pomambræ: Cordi epithemata corroborantia admoveantur. Quanquam verò Pestis sit morbus acutissimus, victus tamen tenuis, qui alias acutis à causa non ve-



nenatâ dependentibus, debetur, hic non competit. Sed, cum vires ut plurimum debiles sint, ægri cibis, qui in parvâ licet quantitate maximam nutriendi vim habent, reficiantur. Talia autem sunt jura consummata ac restaurantia; quibus alterantia alexipharmacis mista, pro caloris excedentis aliarumque circumstantiarum conditione, addi possunt.

#### LVI.

Somnus initio morbi omninò parcior, aut planè prohibeatur, antequam æger bis terve sudaverit; ne cum sanguine venenum ab ambitu corporis ad interiora trahatur. Postquam verò vis veneni aliquantum remiserit, quantum ad virium refectionem necessarium est, potest concedi.

#### LVII.

Si porro (quod sæpius accidit) medicamentum assumptum vomitu rejiciatur, aliud exhiberi illicò oportet, iterumque aliud, donec intra 24 horarum spatium vel tertio repetatur alexipharmacis hujus aut alterius usus. Ratio namque svadet, si plura usurpentur, quod ab uno sperari non poterat, ab alio promptius nos consecuturos.

#### LIIX.

Pestis præterea quidem per se neque Venæsectionem, neque Purgationem indicat; multisque doctissimorum Medicorum observatum est, in plærisque pestilentijs plus damni quam commodi ægros ex utraq; percepisse, & utraque vires debiles magis dejici: hinc raro utraque in usum est trahenda. Vide Pareum *l. de Peste c. 24.* Fonssecam *de sanitate tuenda c. 27.* Forestum, Saracenum & alios. Si ramē in corpore plethora deprehendatur, unde febris periculosæ metus immineat, aut sanguis ad loca inconvenientia ruat, viresve copia oppressæ sint; statim initio antequam vi veneni vires frangantur, Venæsectio parcior institui potest,



test, idq; intra spatium 12 aut ad summum 24 horarum, eo loco, ubi natura remotionem veneni a corde mollitur; minime vero ubi possit in suo recto motu impediri.

### LIX.

De Purgatione illud tenendum est: nullo cathartico medicamento seminarium pestis posse expelli, sed sæpe humorum motu concitato lethales vomitiones ac diarrhoeas esse excitatas. Lenientia tamen (ubi opus est, nec aliud quid obstat) non prohibemus. Fracta jam nimirum malignitate veneni, si corpus parvis abundet humoribus, benedicta cum fructu usurpari possunt.

### LX.

Bubones & carbunculi, qui plærumque pestem comitantur, si naturâ à principibus partibus ad corporis ambitum ejusque emunctoria propellantur, naturæ conatum modis omnibus adjuvemus. Si namque bubones lentius prorumpant aut etiam plane iterum evanescant, præter interna alexipharmaca, materiam venenatam pullis columbarum aut gallinarum vivis, circa podicem deplumatis & forinsecus impositis, bufonibus exsiccatis, cataplasmatibus aut emplastris attrahentibus, (in quorum censu illud magnericum Angeli Salæ laudatur merito à multis) vel illo quod ex cœpe & theriacâ componitur, impositis, attrahere omnino congruum est.

### LXI.

Postquam verò tumor satis prodierit, medicamentis maturantibus suppurationem recte promovemus. Si autem hisce medicamentis ad perfectam suppurationem tumorem perducere non valemus, neque æger melius habeat, nec symptomata minuantur, illâ non expectatâ, veneno, sive ferro sive cauterio sive vesicatorio, sive alijs commodis remediis, exitus parandus est. Quo facto, tutò li-

cet.



cer maturantibus inherere: post vero ad digerentia & mundificantia veniendum. Tandem materiâ venenata expurgatâ, & ulcere mundificato, sarcoticis & epuloticis id consolidamus.

## LXII.

Carbunculi statim sunt scarificandi, idque satis profundè. Tum adhibeantur ea, quæ venenum attrahendi & malignitati resistendi vi pollent. Si verò dolorem & calorem nimium comitem habeant, cataplasmate frigido simulque anodyno aliquo is sopiatur. Cæterum ne venenum semel evocatum ad interiora relabatur, devensivo aliquo circumposito præcaveatur. Si demum eschara forte fuerit inducta, convenienti aliquo unguento illa dematur, ulcusque mundatum carne repleatur. Nonnulli ad anthraces pestilentes multum laudant Sapphirum impostam: imò svadent margines tantum anthracis quasi circumscribere sapphiro, sic enim attrahi omne venenum ad peripheriam illam circumscriptam. Et Helmontius quidem *l. de magnetica vulnerum curatione* summè sapphiri illum usum commendat, non dubitans sapphiro tribuere vim occultam attrahendi virus pestilens, etsi fuerit jam remota ab anthrace, imò non dubitans hoc exemplo evincere vellem, quod agentia nonnulla naturalia in longe distans obiectum operentur. Utrum vero tantis laudibus effectus respondeat, merito dubites: cum vix quisquam scriptorum narret sibimetipsi comperta, sed alienâ fide. Ipse etiam Helmontius in *Tumulo Pestis* valde parcus est in sapphiri laudibus § *Xenexton*, præfertque Sapphiro Hyacinthum non ullo experimento subnixus, ceu decebat, sed illo ridiculo atque inepto argumento, quod Sapphirus fuerit locatus in pectorali sacerdotis Judaici non autem Hyacinthus, diserte etiam § *signa Smaragdum* laudans ait: *Referunt*:



*runt : & mox subjungit ; ego autem semper in dubiis busone pulverisato sum usus. Ut vel hinc appareat, incomperta hominem alibi usque adeò laudavisse, & non nisi futile exemplo vim agendi in distans atque magneticam vim vulnorum curandarum ostendisse. Et verò siquid sapphirus potest in anthracibus, valet vi refrigerandi, quâ etiam potest ardoribus aliarum febrium prodesse.*

#### LXIII.

Cæterum de iis quæ ad præservationem pariter & curationem Pestis illius, quæ à naturalibus causis dependet, faciunt, pro instituti quidem ratione plus satis dictum est. Et si enim plurima alia symptomata illicò soleant Pestem comitari, cum tamen alii quæque morbi quam multa eorum habeant cum Peste communia, earumque curationes passim apud Præcticos legi possint, nos hic pedem figimus. Addendum nunc non nihil restat duntaxat etiam de Peste, quam à supernaturalibus causis interdum oriri, jam tum supra agnovimus. Nec vero hujus sive cavendæ sive curandæ eadem est cum naturali illo Pestis generatio atque conditio. Quæ proinde quemadmodum sese habeat, par est haud ignorare.

#### LXIV.

Ante omnia verò danda est opera, ut supernaturalem Pestem à naturali Medicus queat discernere. Igitur cum primis ad symptomata & omnes Pestis alicujus exortæ conditiones & circumstantias accuratè est attendendum : utrum scilicet illa omnia ejusmodi sint, ut à causis naturalibus possint proficisci, an verò vim talium causarum excedant. Hoc sane si fiat judicatu est facile, quod Pestis non sit naturalis. Si non fiat, non licet tamen sævam illam Pestem solis naturæ viribus vindicare : utpote quum interdum divinum aliquid (ut cum Hippocrate loquamur)



quamur) lateat in morbis, et si effecta supranaturalia haud appareant. Quam igitur difficile sit sæpe, Pestem naturalem à supernaturali discernere, nemini non manifestum est. Potest tamen etiam, saltem ex parte, in tali Peste supernaturale sive divinum quid observari ex eo, si optima quæque remedia, quæ alibi & omni alias in Peste naturali utilia experta sunt, non tantum parum profint, sed videantur etiam quasi violentiam pestilentem intendere. Excedere autem interdum Pestem vim naturalium virium, deprehendere utique facile fuit in Peste, quâ soli primogeniti in Ægypto universi unâ nocte perierunt: quæ in poenam Davidi Regi fuit divinitus prædicta, & cujus causa, angelus nempe Domini, oculis Regis fuit exhibitâ: quâ item unâ nocte universus exercitus Assyriorum interiit. Hæc enim vim naturæ excedunt. Si verum etiam est, quod ferunt, Maximino Imperatore solos gentiles peste occubuisse, salvis Christianis, etiam illa utique divinitus inflicta fuit. Idem dicendum de Peste illa, quam ferunt tertiam quamvis domum infecisse reliquis intactis. Non par vero fuit ratio illius Pestis, quæ solos primum sutores corripuit: cujus supra meminimus; oriri enim illa potuit ex coriis pestilente veneno infectis. Et verò fuisse talia ista coria, testatur & Kircherus. Sed omnia supernaturalia à naturalibus hoc loco discernere nimis longum fuerit.

## LXV.

Quod præcautionem attinet, videntur hæ pestes, si sint ab ira divinâ, non facile evitare posse. Quando tamen à magicis veneficiis dependent, possunt tutissime caveri mutatione loci: si nempe emigres in loca remotiora. Fortassis non abs re etiam fuerit, ubi ejusmodi Pestis Magicæ suspicio est, uti iis, quæ adversis incantationes com-  
perti



perti sunt commodi. Ad Magicæ porro Pestiis sævitiam  
infringendam, imò & sopiendam, nihil utilius videtur,  
quam veneficos ipsos jam manifestos è medio per suppli-  
cia tollere. Hoc modo sanè Pestem Mediolanensem, cu-  
jus meminimus th. 19. ex Kircherò, tandem desisse, ipse-  
met attestatur: antea ingenuè fallus nihil sacris Processio-  
nibus, & circumlato Caroli Borromæi corpore, quo Me-  
diolanum nihil sanctius colit, effectum esse. Non etiam  
desiit Pests Magica illa Silesiensis nuperrima. Huc per-  
tinet, quod ex Joanne Bodino, thesi illa modo citatâ, ad-  
duximus de Peste, quæ non nisi combusto sagæ jam de-  
mortuæ cadavere finita est. Similes autem & in Italiâ ac-  
cidisse, testatur Hercules Saxonia. Fortè & Magica fuit  
Pests Romana, quæ Adriano VI. Papa sæviit in Vrbe illâ.  
Magicis certè remediis cessit. Quam rem non possumus  
non narrare verbis Pauli Jovii, qui illo ipso tempore vi-  
xit Romæ, atque adeo optime fuit rei gestæ conscius. *Ex-  
orta est (inquit) in urbe Pestilentia lues, quæ cum severis legi-  
bus, more nostro, Pontifici minime coercenda videretur, conta-  
ctu aegrorum ita exarsit, ut multa funera in compitis viserentur,  
appareretque vastari urbem, haud multo dierum spatio: nisi Gra-  
culus, nomine Demetrius Spartanus, sedanda Pestilentia, faven-  
te ei turba hominum, negotium suscepisset, nemine superstitionem  
vetare auso. Nam ferum taurum, cui dimidium cornu disseccarat,  
magico carmine dextram in aurem prolato, repente ita mansue-  
factum reddiderat, ut injecto tenui filo ad integrum cornu, quo  
vellet perducens, Pestilentia placando numini ad amphitheatrum  
immolasset. Nec credula multitudinis spes ex toto fefellit: cum  
ab ea inanis sacrificij prospera litatione, mitescere morbus cæpis-  
set. Hæc ille. Quam tamen sedandæ Pestiis rationem ne-  
mo prudens piusque laudaverit: ac proinde nec in usum  
medicum assumpserit. Longè optimum remedium in-*



dubiè à divinâ benignitate est expectandum: qui idcirco  
calidis votis est sollicitandus.

LXVI.

Peste ejusmodi quis, si ve vere divinâ si ve magicâ af-  
fectus, optimum item auxilium necesse est à Deo solo pe-  
tat. Nec enim temerè audemus in aliis magnum præsi-  
dium collocare: quum hætenus experientia nos deferat.  
Nam quæ aliis utilia sunt alexipharmaca, interdum ali-  
quid valere, itidem compertum non est: imò potius il-  
la nullius esse usus, res ferè jam docuit. Quin fatendum  
igitur potius est, in talibus pestilentiis fere frustrâ esse  
medicam omnem opem. Unde & nos non possumus non  
sermonem omnem de Peste abrumpere: Deum precati,  
ut ejusmodi mala procul à finibus nostris es-  
se, velit ac jubeat.

F I N I S.

